

LIGJ

Nr.10 292, datë 1.7.2010

PËR RATIFIKIMIN E KONVENTËS NDËRMJET KËSHILLIT TË MINISTRAVE TË REPUBLIKËS SË SHQIPËRISË DHE QEVERISË SË SHTETIT TË KUVAJTIT PËR SHMANGIEN E TATIMIT TË DYFISHTË DHE PARANDALIMIN E EVAZIONIT FISKAL PËR TATIMET MBI TË ARDHURAT DHE KAPITALIN

Në mbështetje të neneve 78, 83 pika 1 dhe 121 të Kushtetutës, me propozimin e Këshillit të Ministrave,

KUVENDI

I REPUBLIKËS SË SHQIPËRISË

VENDOSI:

Neni 1

Ratifikohet konventa ndërmjet Këshillit të Ministrave të Republikës së Shqipërisë dhe Qeverisë së Shtetit të Kuvajtit për shmangien e tatimit të dyfishtë dhe parandalimin e evazionit fiskal për tatimet mbi të ardhurat dhe kapitalin.

Neni 2

Ky ligj hyn në fuqi 15 ditë pas botimit në Fletoren Zyrtare.

**Shpallur me dekretin nr.6642, datë 15.7.2010 të Presidentit të Republikës së Shqipërisë,
Bamir Topi**

KONVENTË

NDËRMJET KËSHILLIT TË MINISTRAVE TË REPUBLIKËS SË SHQIPËRISË DHE QEVERISË SË SHTETIT TË KUVAJTIT PËR SHMANGIEN E TATIMIT TË DYFISHTË DHE PARANDALIMIN E EVAZIONIT FISKAL NË LIDHJE ME TATIMET MBI TË ARDHURAT DHE KAPITALIN

Këshilli i Ministrave të Republikës së Shqipërisë dhe Qeveria e Shtetit të Kuvajtit, me dëshirën për të promovuar marrëdhëniet e tyre të ndërsjella ekonomike nëpërmjet nënshkrimit, ndërmjet tyre, të një konvente për shmangien e tatimit të dyfishtë dhe parandalimin e evazionit fiskal në lidhje me tatimet mbi të ardhurat dhe kapitalin;

kanë rënë dakord si më poshtë:

Neni 1

Personat e përfshirë

Kjo konventë do të zbatohet për personat që janë rezidentë të një ose të dyja shteteve kontraktuese.

Neni 2

Tatimet e përfshira

1. Kjo konventë do të zbatohet për tatimet mbi të ardhurat dhe kapitalin, të vendosura në emër të një shteti kontraktues ose të nënndarjeve politike apo autoriteteve të tij lokale, pavarësisht nga mënyra në të cilën ato janë vendosur.

2. Do të konsiderohen tatime mbi të ardhurat dhe kapitalin, të gjitha tatimet e vendosura mbi të ardhurat totale, kapitalin e përgjithshëm ose elemente të të ardhurave apo kapitalit, duke përfshirë tatimet mbi fitimet nga tjetërsimi i pasurisë së luajtshme dhe të paluajtshme dhe tatimet mbi sasi të totale të pagave ose rrogave të paguara nga ndërmarrjet, si dhe tatimet mbi vlerësimin e kapitalit.

3. Tatimet ekzistuese për të cilat zbatohet kjo konventë janë veçanërisht:

a) në rastin e Shqipërisë:

1. tatimi i të ardhurave (duke përfshirë tatimin e fitimit të korporatës dhe tatimin individual të të ardhurave);

2. tatimi mbi aktivitetet e biznesit të vogël;

3. tatimi i pronës;

(në vijim referuar si "tatimet shqiptare").

b) në rastin e Kuvajtit:

1. tatimi i të ardhurave të korporatës;

2. kontributi nga fitimet neto të kompanive aksionare të Kuvajtit, të pagueshme për Fondacionin e Kuvajtit për Përparimin e Shkencës (KFAS);

3. Zakati;

4. tatimi që varet nga mbështetja e ligjit kombëtar të punonjësit;

(në vijim të referuar si "tatimet kuvajtiane");

4. Marrëveshja zbatohet gjithashtu për çdo tatim identik ose thelbësisht të ngjashëm që vendoset pas datës së nënshkrimit të konventës, si shtesë ose në vend të tatimeve ekzistuese.

Autoritetet kompetente të shteteve kontraktuese njoftojnë njëra-tjetrën në lidhje me çdo ndryshim thelbësor që është bërë në ligjet e tyre përkatëse mbi tatimet.

Neni 3

Përkufizime të përgjithshme

1. Për qëllime të kësaj Marrëveshjeje, për sa kohë që konteksti nuk e kërkon ndryshe:

a) termi "person" nënkupton një individ, firmë ose grup tjetër personash;

b) termi "firmë" nënkupton çdo person juridik ose ent që trajtohet si person juridik për qëllime tatimore;

c) termi "ndërmarrje e një shteti kontraktues" dhe "ndërmarrje e shtetit tjetër kontraktues" nënkuptojnë përkatësisht një ndërmarrje të administruar nga një rezident i një shteti kontraktues dhe një ndërmarrje të administruar nga një rezident i shtetit tjetër kontraktues;

d) termi "trafik ndërkombëtar" nënkupton çdo transport me anije ose avion të operuar nga një ndërmarrje që e ka vendin e menaxhimit të saj efektiv në një shtet kontraktues, përveçse kur anija ose avioni operohet vetëm midis vendeve në shtetin tjetër kontraktues;

e) termi "Shqipëria" nënkupton Republikën e Shqipërisë dhe kur përdoret në kuptimin gjeografik, nënkupton territorin e Shqipërisë, duke përfshirë ujërat territoriale dhe hapësirën ajrore mbi to, si dhe çdo zonë përtej deteve territoriale të Republikës së Shqipërisë, e cila sipas ligjeve të saj dhe në përputhje me të drejtën ndërkombëtare, është një zonë brenda së cilës Republika e Shqipërisë mund të ushtrojë të drejtat e saj në lidhje me shtratin e detit, nëntokën dhe burimet e tyre natyrore;

f) termi "Kuvajti" nënkupton territorin e shtetit të Kuvajtit dhe përfshin çdo zonë përtej detit territorial që në përputhje me të drejtën ndërkombëtare është caktuar ose mund të caktohet më pas sipas ligjeve të Kuvajtit, si zonë mbi të cilën Kuvajti mund të ushtrojë të drejta sovraane ose juridiksion.

g) termi "shtetas", në lidhje me një shtet kontraktues, nënkupton:

1. çdo individ që ka kombësinë ose shtetësinë e atij shteti kontraktues; dhe

2. çdo person juridik, ortakëri ose shoqatë, statusi i të cilëve rrjedh si i tillë nga ligjet në fuqi në atë shtet kontraktues;

h) termi "tatim" nënkupton tatimin e Kuvajtit ose tatimin shqiptar, siç e kërkon konteksti;

i) termi "autoritet kompetent" nënkupton:

1. në rastin e Shqipërisë: Drejtorinë e Përgjithshme të Tatimeve, të autorizuar nga Ministria e Financave.

2. në rastin e Kuvajtit: Ministrin e Financave ose një përfaqësues të autorizuar të Ministrisë të Financave;

2. Për sa i përket zbatimit të konventës në çdo kohë nga një shtet kontraktues, çdo term i papërkufizuar në të, për sa kohë që konteksti nuk e kërkon ndryshe, ka kuptimin që ka pasur në atë kohë sipas ligjit të atij shteti për qëllime tatimore për të cilat zbatohet kjo konventë, çdo kuptim sipas ligjeve të zbatueshme tatimore të atij shteti të cilat kanë përparësi mbi një kuptim të dhënë termit sipas ligjeve të tjera të atij shteti.

Neni 4

Rezidenti

1. Për qëllime të kësaj, termi "rezident i një shteti kontraktues" nënkupton:

a) në rastin e Kuvajtit:

1. një individ me banim në Kuvajt dhe që është një shtetas kuvajitian dhe një firmë e inkomporuar në Kuvajt;

b) në rastin e Shqipërisë:

1. një individ që ka:

a) banesë të përhershme në dispozicion në territorin e Republikës së Shqipërisë, sipas Kodit Civil;

b) një shtetas shqiptar dhe nëpunës konsullor, diplomat ose nëpunës në një pozicion të ngjashëm i Republikës së Shqipërisë, jashtë Shqipërisë.

2. Një individ që banon në Shqipëri për më shumë se 183 ditë të periudhës së tatueshme, qoftë në mënyrë të njëpasnjëshme apo jo.

3. Një person juridik që:

a) ka banesën e përhershme në Republikën e Shqipërisë;

b) ka një vend të menaxhimit efektiv të biznesit në Republikën e Shqipërisë.

4. Një person fizik sipas legjislacionit specifik mbi regjistrimin e tatimpaguesve.

2. Për qëllime të paragrafit 1, një rezident i një shteti kontraktues do të përfshijë të gjitha sa më poshtë:

a) qeverinë e atij shteti kontraktues dhe çdo nënndarje politike ose autoritet lokal të tij;

b) çdo institucion qeveritar në atë shtet kontraktues sipas ligjit publik, si korporatë, bankë qendrore, fond, autoritet, fondacion, agjenci ose ent tjetër të ngjashëm;

c) çdo ent të krijuar në atë shtet, i gjithë kapitali i të cilit është dhënë nga ai shtet ose çdo nënndarje politike ose autoritet lokal i tij ose çdo institucion qeveritar siç përkufizohet në nënparagrafin "b", së bashku me shtetet e tjera.

3. Kur për shkak të dispozitave të paragrafit 1, një individ është rezident i të dyja shteteve kontraktuese, atëherë statusi i tij përcaktohet si më poshtë:

a) ai konsiderohet të jetë rezident vetëm i shtetit në të cilin ka banesën e vet të përhershme në dispozicion; nëse ka banesë të përhershme në dispozicion në të dyja shtetet, ai do të konsiderohet të jetë rezident vetëm i shtetit me të cilin marrëdhëniet e tij personale dhe ekonomike janë më të afërta (qendra e interesave jetësore);

b) nëse shteti në të cilin ai ka qendrën e interesave të tij jetësore nuk mund të përcaktohet ose nëse nuk ka banesë të përhershme në dispozicion në asnjërin shtet, ai konsiderohet të jetë rezident vetëm i shtetit në të cilin ka banesë të përhershme;

c) nëse ka vendbanim fiks në të dyja shtetet ose në asnjërin prej tyre, ai konsiderohet të jetë rezident vetëm i shtetit nga i cili është shtetas;

d) nëse statusi i tij nuk mund të përcaktohet sipas dispozitës së nënparagrafit "a" deri në "c", autoritetet kompetente të shteteve kontraktuese do të përpiqen ta zgjidhin çështjen me anë të marrëveshjes së ndërsjellë.

4. Kur për shkak të dispozitave të paragrafëve 1 dhe 2, një person i ndryshëm nga një individ, është rezident i të dyja shteteve kontraktuese, atëherë ai konsiderohet të jetë rezident vetëm i shtetit në të cilin ndodhet vendi i menaxhimit të tij efektiv.

Neni 5

Selia e përhershme

1. Për qëllime të kësaj, termi "seli e përhershme" nënkupton një vend fiks biznesi, nëpërmjet të cilit administrohet biznesi i një ndërmarrjeje në mënyrë të plotë ose të pjesshme.

2. Termi "seli e përhershme" përfshin, në veçanti:

a) një vend menaxhimi;

b) një degë;

c) një zyrë;

- d) një fabrikë;
- e) një punishte; dhe
- f) një minierë, pus naftë ose gaz, një gurore ose çdo vend tjetër që ka lidhje me eksplorimin ose shfrytëzimin e burimeve natyrore.
3. Një shesh ndërtimi, ndërtesë, një projekt instalimi, konstruksioni ose montimi ose aktivitetet mbikëqyrës në lidhje me to, të kryera në një shtet kontraktues, përbëjnë seli të përhershme vetëm nëse ky shesh, projekt ose këto aktivitete vazhdojnë për një periudhë më shumë se gjashtë muaj.
4. Dhënia e shërbimeve, duke përfshirë shërbimet e konsulencës ose ato menaxheriale nga një ndërmarrje e një shteti kontraktues nëpërmjet punonjësve të saj ose personelit tjetër të përfshirë nga ndërmarrja për atë qëllim, në shtetin tjetër përbën një seli të përhershme, vetëm nëse aktivitetet e asaj natyre vazhdojnë për një periudhë ose periudha që arrijnë në total më shumë se gjashtë muaj brenda çdo periudhe dymbëdhjetëmuajore.
5. Një ndërmarrje e një shteti kontraktues nuk do të konsiderohet të ketë seli të përhershme në shtetin tjetër nëse pajisjet ose makineritë kryesore teknike, mekanike ose shkencore përdoren për një periudhë më shumë sesa gjashtë muaj brenda periudhës dymbëdhjetëmuajore ose instalohen në atë shtet tjetër nga, për ose sipas kontratës me ndërmarrjen.
6. Pavarësisht dispozitave paraardhëse të këtij neni, termi "seli e përhershme" do të konsiderohet të mos përfshijë:
- a) përdorimin e ambienteve vetëm për qëllime magazinimi, ekspozimi ose shpërndarjeje të mallrave që i përkasin ndërmarrjes;
 - b) mirëmbajtjen e një rezerve mallrash që i përkasin ndërmarrjes vetëm për qëllime magazinimi, ekspozimi ose shpërndarjeje;
 - c) mirëmbajtjen e një rezerve mallrash që i përkasin ndërmarrjes vetëm për qëllime të përpunimit nga ndërmarrja tjetër;
 - d) mirëmbajtjen e një vendi fiks biznesi vetëm për qëllim të blerjes së mallrave ose të mbledhjes së informacionit për ndërmarrjen;
 - e) mirëmbajtjen e një vendi fiks biznesi vetëm për qëllim të administrimit për ndërmarrjen, të çdo aktiviteti tjetër të një karakteri përgatitor ose ndihmës;
 - f) mirëmbajtjen e një vendi fiks biznesi vetëm për çdo kombinim të aktiviteteve të përmendura në nënparagrafët "a" deri "e", me kusht që aktiviteti i përgjithshëm i vendit fiks të biznesit që rezulton nga ky kombinim, të jetë i një karakteri përgatitor ose ndihmës.
7. Pavarësisht nga dispozitat e paragrafëve 1 dhe 2, kur një person i ndryshëm nga një agjent me status të pavarur për të cilin zbatohet paragrafi 8, vepron në emër të një ndërmarrjeje dhe ka e ushtron rregullisht në një shtet kontraktues autoritet për të nënshkruar kontrata në emër të ndërmarrjes, ajo ndërmarrje do të konsiderohet të ketë seli të përhershme në atë shtet në lidhje me çdo aktivitet që personi ndërmerr për ndërmarrjen, nëse aktivitetet e atij personi nuk kufizohen në ato të përmendura në paragrafin 6 që, nëse ushtron nëpërmjet një vendi fiks biznesi, nuk do ta bënin atë vend fiks të qëndrueshëm biznesi një seli të përhershme sipas dispozitave të atij paragrafi.
8. Një ndërmarrje nuk do të konsiderohet të ketë seli të përhershme në një shtet kontraktues thjesht sepse administron biznesin në atë shtet nëpërmjet një ndërmjetësi, agjenti të përgjithshëm komisionesh ose një agjenti tjetër me status të pavarur, me kusht që ata persona të veprojnë gjatë rrjedhës normale të biznesit të tyre. Megjithatë, kur aktivitetet e atij agjenti përkushtohen tërësisht ose pothuajse tërësisht ndaj asaj ndërmarrjeje dhe ndërmarrjeve të tjera që kontrollohen nga ai ose kanë një interes kontrollues në të, ai nuk do të konsiderohet agjent me status të pavarur brenda kuptimit të këtij paragrafi.
9. Fakti se një firmë që është rezidente e një shteti kontraktues kontrollon ose kontrollohet nga një kompani e cila është rezidente e shtetit tjetër kontraktues ose që administron biznesin në atë shtet tjetër (qoftë nëpërmjet një selie të përhershme ose në ndonjë formë tjetër) nuk do të përbëjë në vetvete çdo firmë seli të përhershme të firmës tjetër.

Neni 6

Të ardhurat nga pasuria e paluajtshme

1. Të ardhurat që rrjedhin nga një rezident i një shteti kontraktues nga pasuria e paluajtshme (duke përfshirë të ardhurat nga bujqësia ose pylltaria) të ndodhura në shtetin tjetër kontraktues, mund të taten në atë shtet tjetër.

2. Termi “pasuri e paluajtshme” do të ketë kuptimin që ka sipas ligjit të shtetit kontraktues në të cilin ndodhet prona në fjalë. Në çdo rast, termi do të përfshijë pronën në vartësi të pronës së paluajtshme, gjësë së gjallë dhe pajisjeve të përdorura në bujqësi dhe pylltari, të drejtat për të cilat zbatohen dispozitat e legjisllacionit të përgjithshëm në lidhje me tokën në pronësi, uzufuktin e pasurisë së paluajtshme dhe të drejtat për pagesa variabël ose fikse si shpërblim për punën ose të drejtën për të punuar, depozitat minerale, burimet dhe burimet e tjera natyrore; anijet, barkat dhe avionët nuk do të konsiderohen si pasuri e paluajtshme.

3. Dispozitat e paragrafit 1 do të zbatohen për të ardhurat që rrjedhin nga përdorimi i drejtpërdrejtë, lënia ose përdorimi në çdo formë tjetër i pasurisë së paluajtshme.

4. Dispozitat e paragrafëve 1 dhe 3 do të zbatohen gjithashtu për të ardhurat nga pasuria e paluajtshme e një ndërmarrjeje.

Neni 7

Përfitimet e biznesit

1. Përfitimet e një ndërmarrjeje të një shteti kontraktues do të taten vetëm në atë shtet, për sa kohë që ndërmarrja administron biznesin në shtetin tjetër kontraktues nëpërmjet një selie të përhershme të vendosur në të. Nëse ndërmarrja administron biznesin siç është përmendur më sipër, përfitimet e ndërmarrjes mund të taten në shtetin tjetër, por vetëm për ato që i atribuohen asaj selie të përhershme.

2. Duke i referuar dispozitave të paragrafit 3, kur një ndërmarrje e një shteti kontraktues administron biznesin në shtetin tjetër kontraktues nëpërmjet një selie të përhershme të vendosur në të, në çdo shtet kontraktues do t'i atribuohen asaj selie të përhershme përfitimet të cilat mund të priten të nxjerrë nëse do të ishte një ndërmarrje më vete dhe e ndarë, e përfshirë në aktivitete të njëjta ose të ngjashme, sipas kushteve të njëjta ose të ngjashme dhe që trajtojnë tërësisht në mënyrë të pavarur ndërmarrjen e së cilës është selia e përhershme.

3. Në përcaktimin e përfitimeve të një selie të përhershme, do të lejohen si zbritje shpenzimet që janë bërë për qëllime të selisë së përhershme, duke përfshirë shpenzimet ekzekutive dhe të përgjithshme administrative të bëra qoftë në shtetin në të cilin ndodhet selia e përhershme, ose diku tjetër, duke marrë në konsideratë çdo ligj ose rregullore të zbatueshme.

4. Për sa kohë që vendoset normalisht në një shtet kontraktues të përcaktojë përfitimet që do t'i atribuohen një selie të përhershme mbi bazën e një ndarjeje të përfitimeve totale të ndërmarrjes ndaj pjesëve të saj të ndryshme, asnjë dispozitë e paragrafit 2 nuk do të përjashtojë atë shtet kontraktues nga përcaktimi i përfitimeve që do të taten nga kjo ndarje, siç mund të jetë normale; megjithatë, metoda e ndarjes së miratuar do të jetë e tillë që rezultati të jetë në përputhje me parimet në përmbajtje të këtij neni.

5. Asnjë përfitim nuk do t'i atribuohet selisë së përhershme për shkak vetëm të blerjes nga ajo seli e përhershme të mallrave për ndërmarrjen.

6. Për qëllime të paragrafëve të mësipërm, përfitimet që do t'i atribuohen selisë së përhershme, do të përcaktohen me anë të së njëjtës metodë vit pas viti, për sa kohë që nuk ka arsye të fortë dhe të mjaftueshme për të kundërtën.

7. Kur përfitimet përfshijnë zërat e të ardhurave që trajtohen ndarazi në nenet e tjera të Marrëveshjes, atëherë dispozitat e atyre neneve nuk do të cenohen nga dispozitat e këtij neni.

Neni 8

Transporti detar dhe ajror

1. Përfitimet nga operimi i anijeve ose avionëve në trafikun ndërkombëtar do të taten vetëm në shtetin kontraktues në të cilin ndodhet vendi i menaxhimit efektiv të ndërmarrjes.

2. Për qëllime të këtij neni, përfitimet nga operimi i anijeve ose avionëve në trafikun ndërkombëtar përfshijnë përfitimet nga dhënia me qira mbi bazën e një lizingu nga kontraktuesit të anijeve ose avionëve, kur kjo dhënie me qira apo përdorim, mirëmbajtje ose dhënie me qira, sipas rastit, ka lidhje rastësore me operimin e anijeve ose avionëve në trafikun ndërkombëtar.

3. Dispozitat e paragrafit 1 do të zbatohen gjithashtu për përfitimet e nxjerra nga pjesëmarrja në një ortakëri, biznes të përbashkët ose agjenci operuese ndërkombëtare.

Neni 9

Ndërmarrjet e asociuara

1. Kur:

a) një ndërmarrje e një shteti kontraktues merr pjesë në mënyrë të drejtpërdrejtë ose jo në menaxhimin, kontrollin ose kapitalin e një ndërmarrjeje të shtetit tjetër kontraktues, ose

b) të njëjtët persona marrin pjesë në mënyrë të drejtpërdrejtë ose jo në menaxhimin, kontrollin ose kapitalin e një ndërmarrjeje të një shteti kontraktues dhe një ndërmarrje të shtetit tjetër kontraktues, dhe kur në çdo rast, janë përgatitur ose vendosur kushtet midis dy ndërmarrjeve në lidhje me marrëdhëniet e tyre tregtare ose financiare që ndryshojnë nga ato që do të bëheshin midis ndërmarrjeve, të pavarura, atëherë çdo përfitim, që për shkak të atyre kushteve do t'i ishte shtuar një prej ndërmarrjeve, por për shkak të këtyre kushteve nuk është shtuar, mund të përfshihet në përfitimet e asaj ndërmarrjeje dhe për rrjedhojë të tatonet.

2. Kur një shtet kontraktues përfshin në përfitimet e një ndërmarrjeje të shtetit-dhe rrjedhimisht tatim-fitimet mbi të cilat një ndërmarrje e shtetit tjetër kontraktues është ngarkuar të tatonë në atë shtet tjetër dhe kur përfitimet e përfshira në këtë mënyrë janë përfitimet të cilat do t'i ishin shtuar ndërmarrjes së shtetit të përmendur më parë, nëse kushtet e vendosura midis dy ndërmarrjeve kishin qenë ato që do të ishin vendosur midis ndërmarrjeve të pavarura, atëherë shteti tjetër do të bëjë një rregullim të përshtatshëm të shumës së tatimeve të vendosura në to mbi ato fitime. Në përcaktimin e këtij rregullimi, duhet t'u kushtohet vëmendje dispozitave të tjera të kësaj dhe autoritetet kompetente të shteteve kontraktuese, nëse është e nevojshme, do të konsultohen me njëra-tjetrën.

Neni 10

Dividendët

1. Dividendët e paguar nga një firmë që është rezidente e një shteti kontraktues ndaj një rezidenti të shtetit tjetër kontraktues, i cili është pronari përfitues i këtyre dividendëve, do të tatonen vetëm në atë shtet tjetër.

2. Megjithatë, këta dividendë mund të tatonen gjithashtu në shtetin kontraktues në të cilin është rezidente firma që paguan dividendët dhe sipas ligjeve të atij shteti, por nëse pronari përfitues i dividendëve është rezident i shtetit tjetër kontraktues, tatimi nuk do të tejkalojë:

a) 0% për qind të sasisë bruto të dividendëve nëse pronari përfitues është shteti tjetër përfitues ose çdo institucion ose ent qeveritar që është rezident i shtetit tjetër kontraktues sipas dispozitave të nënparagrafëve "a"- "c" të paragrafit 2 të nenit 4;

b) 5% të sasisë bruto të dividendëve të pronarit përfitues është një firmë (e ndryshme nga një ortakëri) që zotëron në mënyrë të drejtpërdrejtë të paktën 10% të kapitalit të firmës që paguan dividendët;

c) 10% të sasisë bruto të dividendëve në të gjitha rastet e tjera.

Dispozitat e këtij paragrafi nuk do të cenojnë tatimin e firmës në lidhje me përfitimet nga të cilat janë paguar dividendët.

2. Termi "dividendë", siç përdoret në këtë nen, nënkupton të ardhurat nga aksionet e çdo lloji ose të drejta të tjera që nuk janë detyrime borxhi, që marrin pjesë në përfitime, si dhe të ardhura nga të drejta të tjera korporate të cilat i nënshtrohen të njëjtit trajtim tatimor si të ardhurat nga aksionet nga ligjet e shtetit në të cilin firma që bën shpërndarjen është rezidente.

3. Dispozitat e paragrafëve 1 dhe 2 nuk do të zbatohen nëse pronari përfitues i dividendëve, duke qenë rezident i një shteti kontraktues, administron biznesin në shtetin tjetër kontraktues në të cilin firma që paguan dividendët është rezidente, nëpërmjet një selie të përhershme të vendosur në të ose që kryen në atë shtet shërbime personale të pavarura nga një bazë fikse e vendosur në të dhe që aksioni në lidhje me të cilin janë paguar dividendët është efektivisht i lidhur me selinë e përhershme ose bazën fikse. Në këtë rast, do të zbatohen sipas rastit dispozitat e nenit 7 ose nenit 14.

Neni 11

Interesi

1. Interesi i nxjerrë në një shtet kontraktues dhe i paguar ndaj një rezidenti të shtetit tjetër kontraktues, i cili është pronari përfitues i këtij interesi, do të tatonet në atë shtet tjetër kontraktues.

2. Megjithatë, ky interes mund të tatohet në shtetin kontraktues në të cilin lind dhe sipas ligjeve të atij shteti, por nëse pronari përfitues i interesit është rezident i shtetit tjetër kontraktues, tatimi nuk do të tejkalojë 10 për qind të shumës bruto të interesit.

3. Pavarësisht nga dispozitat e paragrafëve 1 dhe 2, interesi që lind në një shtet kontraktues do të përjashtohet nga tatimi nëse rrjedh nga një rezident i shtetit tjetër kontraktues siç përkufizohet në paragrafin 2 të nenit 4.

4. Termi “interes” siç përdoret në këtë nen, nënkupton të ardhurat nga detyrimet e borxhit të çdo lloji, i siguruar apo jo me hipotekë dhe duke mbartur ose jo një të drejtë për të marrë pjesë në përfitimet e debitorit, në veçanti, të ardhurat nga letrat me vlerë qeveritare dhe të ardhurat nga obligacionet dhe dëftesat e borxhit, duke përfshirë primet dhe çmimet që i bashkëlidhen atyre letrave me vlerë, obligacioneve ose dëftesave borxhi, si dhe të ardhurat që i nënshtrohen të njëjtit trajtim tatimor si të ardhurat nga paratë e dhëna hua nga ligjet tatimore të shtetit kontraktues në të cilin krijohen të ardhurat. Tarifat e gjobës për vonesë pagese nuk do të konsiderohen si interesa për qëllim të këtij neni.

5. Dispozitat e paragrafit 1 nuk do të zbatohen nëse pronari përfitues i interesit, duke qenë rezident i një shteti kontraktues, administron biznesin në shtetin tjetër kontraktues në të cilin lind interesi, nëpërmjet një selie të përhershme të vendosur në të dhe detyrimi i borxhit në lidhje me të cilin është paguar interesi, është efektivisht i lidhur me këtë seli të përhershme ose bazë fikse. Në këtë rast, do të zbatohen dispozitat e nenit 7 ose 14.

6. Interesi do të konsiderohet të lindë në një shtet kontraktues kur paguesi është rezident i atij shteti. Megjithatë, kur një person që paguan interesin, qoftë rezident i shtetit kontraktues apo jo, ka në një shtet kontraktues seli të përhershme ose bazë fikse në lidhje me të cilën ka ndodhur mbetja e borxhit mbi të cilën është paguar interesi dhe ky interes përballohet nga kjo seli e përhershme, atëherë ky interes do të konsiderohet të lindë në shtetin në të cilin ndodhet selia e përhershme.

7. Kur për shkak të një marrëdhënieje të veçantë midis paguesit dhe pronarit përfitues ose midis të dyve dhe një personi tjetër, sasia e interesit, duke marrë parasysh detyrimin e borxhit për të cilin është paguar, tejkalon shumën e cila do të ishte rënë dakord nga paguesi dhe pronari përfitues në mungesë të kësaj marrëdhënieje, do të zbatohen dispozitat e këtij neni vetëm për sasinë e përmendur së fundi. Në këtë rast, pjesa e tepërt e pagesave do të mbetet e tatueshme sipas ligjeve të secilit shtet kontraktues, duke i kushtuar vëmendje dispozitave të tjera të kësaj Marrëveshjeje.

Neni 12

Pagesat për të drejtat e autorit

1. Pagesat për të drejtat e autorit që lindin në një shtet kontraktues dhe të paguara ndaj një rezidenti të shtetit tjetër kontraktues, mund të tatohen në atë shtet tjetër kontraktues.

2. Megjithatë, këto pagesa për të drejtat e autorit mund të tatohen gjithashtu në shtetin kontraktues në të cilin ato lindin dhe sipas ligjeve të atij shteti kontraktues, por nëse pronari përfitues i pagesave për të drejtat e autorit është rezident i shtetit tjetër kontraktues, tatimi nuk do të tejkalojë 10 për qind të shumës bruto të këtyre pagesave për të drejtat e autorit.

3. Termi “pagesa për të drejtat e autorit”, siç përdoret në këtë nen, nënkupton pagesat e çdo lloji të marra në lidhje me përdorimin ose të drejtën e përdorimit të çdo të drejte autori të veprës letrare, artistike ose shkencore, duke përfshirë filma kinematografikë, çdo patentë, markë tregtare, projekt ose model, plan, formulë sekrete ose proces, ose për informacion në lidhje me përvojën industriale, tregtare ose shkencore.

4. Dispozitat e paragrafëve 1 dhe 2 nuk do të zbatohen nëse pronari përfitues i pagesave për të drejtat e autorit, duke qenë rezident i një shteti kontraktues, administron biznesin në shtetin tjetër kontraktues në të cilin lindin pagesat për të drejtat e autorit, nëpërmjet një selie të përhershme të vendosur në të ose kryen në atë shtet tjetër shërbime personale të pavarura nga një bazë fikse të vendosur në të dhe e drejta ose pronësia në lidhje me të cilat janë paguar pagesat për të drejtat e autorit është e lidhur efektivisht me këtë seli të përhershme ose bazë fikse. Në këtë rast, do të zbatohen dispozitat e nenit 7 ose nenit 14.

5. Kur për shkak të një marrëdhënieje të veçantë midis paguesit dhe pronarit përfitues ose midis të dyve dhe një personi tjetër, shuma e pagesave për të drejtat e autorit, duke marrë në konsideratë përdorimin, të drejtën ose informacionin për të cilin ato janë paguar, tejkalon shumën që do të ishte rënë dakord nga paguesi dhe pronari përfitues në mungesë të kësaj marrëdhënieje, do të zbatohen dispozitat e këtij neni vetëm për sasinë e përmendur së fundi. Në këtë rast, pjesa e tepërt e pagesave do të mbetet e tatueshme sipas ligjeve të secilit shtet kontraktues, duke i kushtuar vëmendje dispozitave të tjera të kësaj.

Neni 13

Fitimet e kapitalit

1. Fitimet e nxjerra nga një rezident i një shteti kontraktues nga tjetërsimi i pasurisë së paluajtshme të referuar në nenin 6 dhe të ndodhur në shtetin tjetër kontraktues, mund të tatohen në atë shtet tjetër.
2. Fitimet nga tjetërsimi i pasurisë së luajtshme, që përbëjnë pjesë të pasurisë së biznesit të një selie fikse që një ndërmarrje e një shteti kontraktues ka në shtetin tjetër kontraktues, duke përfshirë këto fitime nga tjetërsimi i kësaj selie të përhershme (vetëm ose me të gjithë ndërmarrjen) mund të tatohen në atë shtet tjetër.
3. Fitimet nga tjetërsimi i anijeve ose avionëve që operojnë në trafikun ndërkombëtar ose pasuria e luajtshme që i përket operimit të këtyre anijeve apo avionëve, do të tatohen vetëm në shtetin kontraktues në të cilin ndodhet vendi i menaxhimit efektiv të ndërmarrjes.
4. Fitimet nga tjetërsimi i çdo prone të ndryshme nga ajo e referuar në paragrafët 1, 2 dhe 3, do të tatohen vetëm në shtetin kontraktues në të cilin tjetërsuesi është rezident.

Neni 14

Shërbimet personale të pavarura

1. Të ardhurat që rrjedhin nga një individ që është rezident i një shteti kontraktues në lidhje me shërbimet profesionale ose shërbime të tjera të ngjashme të një karakteri të pavarur, do të tatohen vetëm në atë shtet, përveç rrethanave kur këto të ardhura mund të tatohen edhe në shtetin tjetër kontraktues:
 - a) nëse ai ka një bazë fikse që i vihet rregullisht në dispozicion në shtetin tjetër kontraktues për qëllim të kryerjes së aktiviteteve të tij; në atë rast vetëm ajo pjesë e të ardhurave që i atribuohet asaj baze fikse mund të tatohet në atë shtet tjetër kontraktues; ose
 - b) nëse qëndrimi i tij në shtetin tjetër kontraktues është për një periudhë ose periudha që arrijnë apo tejkalojnë në total 183 ditë në çdo periudhë dymbëdhjetëmujore që fillon ose përfundon në vitin fiskal përkatës; në atë rast vetëm ajo sasi të ardhurash që rrjedh nga aktivitetet e tij të kryera në atë shtet tjetër, mund të tatohet në atë shtet tjetër.
2. Termi “shërbime profesionale” përfshin veçanërisht aktivitetet e pavarura shkencore, letrare, artistike, arsimore ose didaktike, si dhe aktivitetet e pavarura të mjekëve, dentistëve, avokatëve, inxhinierëve, arkitektëve, revizorëve dhe kontabilistëve.

Neni 15

Shërbimet personale të varura

1. Në bazë të dispozitave të neneve 16, 18, 19, 20 dhe 21, rrogat, pagat dhe shpërblime të tjera të ngjashme që rrjedhin nga një rezident i një shteti kontraktues në lidhje me një punësim do të tatohen vetëm në atë shtet kontraktues nëse puna nuk ushtrohet në shtetin tjetër kontraktues. Nëse puna ushtrohet në këtë mënyrë, ky shpërblim, siç rrjedh nga to, mund të tatohet në atë shtet tjetër kontraktues.
2. Pavarësisht nga dispozitat e paragrafit 1, shpërblimi që rrjedh nga një rezident i një shteti kontraktues në lidhje me një punë të ushtruar në shtetin tjetër kontraktues, do të tatohet vetëm në shtetin e përmendur më parë nëse:
 - a) rezidenti është i pranishëm në shtetin tjetër kontraktues për një periudhë ose periudha që nuk tejkalojnë në total 183 ditë në çdo periudhë dymbëdhjetëmujore që fillon ose mbaron në vitin fiskal përkatës;
 - b) shpërblimi paguhet nga ose në emër të një punëdhënësi i cili nuk është rezident i shtetit tjetër kontraktues;
 - c) shpërblimi nuk përballohet nga një seli e përhershme ose një bazë fikse që punëdhënësi ka në shtetin tjetër kontraktues.
3. Pavarësisht nga dispozitat paraardhëse të këtij neni, shpërblimi që rrjedh në lidhje me një punë të ushtruar në një anije ose avion të operuar në trafikun ndërkombëtar nga një ndërmarrje e një shteti kontraktues, mund të tatohet në atë shtet kontraktues.
4. Staf i bazë i emëruar nga zyra kryesore e transportuesit kombëtar ajror të një shteti kontraktues për shtetin tjetër kontraktues do të përjashtohet nga tatimet e vendosura mbi shpërblimet e tyre në atë shtet tjetër kontraktues.

Neni 16

Tarifat e drejtuesve

Tarifat e drejtuesve dhe pagesa të tjera të ngjashme që rrjedhin nga një rezident i një shteti kontraktues në cilësinë e tij si anëtar i bordit të drejtuesve ose një organi të ngjashëm të një firme e cila është rezidente e shtetit tjetër kontraktues, mund të taten vetëm në shtetin e përmendur më parë.

Neni 17

Artistët dhe sportistët

1. Pavarësisht nga dispozitat e neneve 14 dhe 15, të ardhurat që rrjedhin nga një rezident i një shteti kontraktues në rolin e subjektit argëtues, si në teatër, film, artist radioje ose televizioni, ose muzikant apo sportist, nga aktivitetet personale të ushtruara në këtë mënyrë në shtetin tjetër kontraktues, mund të taten në atë shtet tjetër kontraktues.

2. Kur të ardhurat në lidhje me aktivitetet personale të ushtruara nga një subjekt argëtues ose sportist në cilësinë e tij si i tillë, nuk i shtohen subjektit argëtues ose sportistit, por një personi tjetër, ato të ardhura, pavarësisht nga dispozitat e neneve 7, 14 dhe 15, mund të taten në shtetin kontraktues në të cilin ushtrohen aktivitetet e subjektit argëtues apo sportistit.

3. Dispozitat e paragrafëve 1 dhe 2 nuk zbatohen për të ardhurat që rrjedhin nga subjektet argëtuese ose sportistët të cilët janë rezidentë të një shteti kontraktues nga aktivitetet personale siç ushtrohen në shtetin tjetër kontraktues nëse vizita e tyre në atë shtet tjetër kontraktues mbështetet kryesisht nga fondet publike të shtetit kontraktues të përmendur më parë, duke përfshirë ato të çdo nënndarjeje politike, autoriteti lokal ose organi statutor të tij, as ndaj të ardhurave që rrjedhin nga një organizatë jofitimprurëse në lidhje me këto aktivitete nëse asnjë pjesë e të ardhurave të saj nuk është e pagueshme ose e vënë në dispozicion në ndonjë mënyrë tjetër për përfitimin personal të pronarëve, themeluesve ose anëtarëve të saj.

Neni 18

Pensionet dhe pensionet vjetore

1. Në bazë të dispozitave të paragrafit 2 të nenit 19, pensionet dhe shpërblimet e tjera të ngjashme dhe pensionet vjetore të paguara për një individ që është rezident i një shteti kontraktues në lidhje me punësimin e shkuar, do të taten vetëm në atë shtet kontraktues.

Neni 19

Shërbimi qeveritar

1. a) Rrogat, pagat dhe shpërblime të tjera të ngjashme, të ndryshme nga një pension, të paguara nga një shtet kontraktues ose një nënndarje politike ose një autoritet lokal i tij ndaj një individi në lidhje me shërbimet e kryera për atë shtet ose nënndarje ose autoritet do të taten vetëm në atë shtet kontraktues.

b) Megjithatë, këto rroga, paga dhe shpërblime të tjera të ngjashme do të taten vetëm në shtetin tjetër kontraktues, nëse shërbimet kryhen në atë shtet kontraktues dhe nëse individi është rezident i atij shteti kontraktues që:

i) është shtetas i atij shteti kontraktues, ose

ii) nuk është bërë rezident i atij shteti kontraktues vetëm për qëllim të kryerjes së shërbimeve.

2. a) Çdo pension i paguar nga ose prej fondeve të krijuara nga një shtet kontraktues ose nënndarje politike ose autoritet lokal i tij për një individ në lidhje me shërbimet e kryera në atë shtet kontraktues ose nënndarje ose autoritet, do të taten vetëm në atë shtet kontraktues.

b) Megjithatë, ky pension do të taten vetëm në shtetin tjetër kontraktues nëse individi është rezident dhe shtetas i atij shteti tjetër kontraktues.

3. Dispozitat e neneve 15, 16 dhe 18 do të zbatohen për rrogat, pagat dhe shpërblime të tjera të ngjashme dhe pensione në lidhje me shërbimet e kryera për një biznes të administruar nga një shtet kontraktues ose nënndarje politike ose autoritet lokal të tij.

Neni 20

Mësuesit dhe kërkuesit

Një individ i cili menjëherë para se të vizitonte një shtet kontraktues, është ose ishte resident i shtetit tjetër kontraktues dhe që, me ftesë të qeverisë së shtetit kontraktues të përmendur më parë ose të një universiteti, kolegji, shkolle, muzeu ose institucioni tjetër kulturor në atë shtet kontraktues të përmendur më parë ose sipas një programi zyrtar të shkëmbimit kulturor, është i pranishëm në atë shtet kontraktues për një periudhë që nuk kalon dy vite të njëpasnjëshme vetëm për qëllim të mësimdhënies, dhënies së leksioneve ose kryerjes së kërkimeve në atë institucion, do të përjashtohet nga tatimi në atë shtet kontraktues mbi pagesën e tij për atë aktivitet.

Neni 21

Studentët dhe stazhierët

1. Pagesat për qëllim të shpenzimeve të jetesës, arsimimit ose trajnimit, të marra nga një student ose stazhier biznesi i cili menjëherë para se të vizitonte një shtet kontraktues është ose ishte rezident i shtetit tjetër kontraktues dhe që është i pranishëm në shtetin kontraktues të përmendur më parë vetëm për qëllim të arsimimit ose trajnimit të tij, nuk do të tatohen në atë shtet kontraktues.

2. Pavarësisht nga dispozitat e paragrafit 1, shpërblimet që për një student ose stazhier biznesi, i cili menjëherë para se të vizitonte një shtet kontraktues është ose ishte rezident i shtetit tjetër kontraktues dhe që është i pranishëm në shtetin e përmendur më parë vetëm për qëllim të arsimimit ose trajnimit të tij, rrjedhin nga shërbimet e përkohshme të kryera në shtetin kontraktues të përmendur më parë, nuk do të tatohen në atë shtet kontraktues nëse këto shërbime kanë lidhje me arsimimin ose trajnimin e tij dhe se shpërblimet për këto shërbime janë të nevojshme për të plotësuar burimet në dispozicion të tij për qëllim të shpenzimeve të tij të jetesës.

Neni 22

Të ardhura të tjera

1. Zërat e të ardhurave të një rezidenti të një shteti kontraktues, kudo që lindin të patrajtuara në nenet paraardhëse të kësaj, do të tatohen vetëm në atë shtet.

2. Dispozitat e paragrafit 1 nuk do të zbatohen për të ardhurat e ndryshme nga të ardhurat nga pasuria e paluajtshme, siç përcaktohet në paragrafin 2 të nenit 6, nëse marrësi i këtyre të ardhurave, duke qenë rezident i një shteti kontraktues, administron biznesin në shtetin tjetër kontraktues nëpërmjet një selie të përhershme të vendosur në të ose kryen në atë shtet tjetër shërbime personale të pavarura nga një bazë fikse të vendosur në të, dhe e drejta ose prona në lidhje me të cilat janë paguar të ardhurat është efektivisht e lidhur me atë seli të përhershme. Në këtë rast, do të zbatohen sipas rastit dispozitat e nenit 7 ose nenit 15.

Neni 23

Kapitali

1. Kapitali i përfaqësuar nga pasuria e paluajtshme e referuar në nenin 6, i zotëruar nga një rezident i një shteti kontraktues dhe i vendosur në shtetin tjetër kontraktues, mund të tatohet në atë shtet tjetër kontraktues.

2. Kapitali i përfaqësuar nga pasuria e luajtshme që përbën pjesë të pronës së biznesit të një selie të përhershme, të cilin një ndërmarrje e një shteti kontraktues ka në shtetin tjetër kontraktues ose nga pasuria e luajtshme që i përket një baze fikse në dispozicion të një rezidenti të një shteti kontraktues në shtetin tjetër kontraktues, për qëllim të kryerjes së shërbimeve personale të pavarura, mund të tatohet në atë shtet tjetër kontraktues.

3. Kapitali i përfaqësuar nga anijet dhe avionët e operuar në trafikun ndërkombëtar nga një ndërmarrje e një shteti kontraktues dhe nga pasuria e luajtshme që i përkasin operimit të këtyre anijeve, avionëve, barkave, do të tatohet vetëm në atë shtet kontraktues.

4. Të gjitha elementet e tjera të kapitalit të një rezidenti të një shteti kontraktues do të tatohen vetëm në atë shtet kontraktues.

Neni 24

Eliminimi i tatimit të dyfishtë

1. Ligjet në fuqi në secilin prej shteteve kontraktuese do të vazhdojnë të rregullojnë tatimin në shtetin kontraktues përkatës, përveç rasteve kur dispozitat për të kundërtën janë hartuar në këtë konventë.

2. Është rënë dakord se tatimi i dyfishtë do të shmanget në përputhje me paragrafët e mëposhtëm të këtij neni:

a) Në rastin e Kuvajtit:

Kur një rezidenti i Kuvajtit nxjerr të ardhura ose zotëron kapital që në përputhje me dispozitat e kësaj mund të taten si në Kuvajt, dhe në Shqipëri, Kuvajti do të lejojë si zbritje nga tatimet mbi të ardhurat e atij rezidenti, një shumë të barabartë me tatimin e të ardhurave të paguar në Shqipëri dhe si zbritje nga tatimi mbi kapitalin e atij rezidenti një shumë të barabartë me tatimin e kapitalit të paguar në Shqipëri;

Megjithatë, kjo zbritje, në çdo rast, nuk do ta kalojë atë pjesë të tatimit mbi të ardhurat ose kapitalin, siç llogaritet para se të jepet zbritja që i atribuohet sipas rastit, të ardhurave ose kapitalit që mund të taten në Shqipëri.

b) Në rastin e Shqipërisë:

Kur një rezidenti i Kuvajtit nxjerr të ardhura ose zotëron kapital që në përputhje me dispozitat e kësaj mund të taten si në Shqipëri dhe në Kuvajt, Shqipëria do të lejojë si zbritje nga tatimi mbi të ardhurat e atij rezidenti një shumë të barabartë me tatimin e të ardhurave të paguara në Kuvajt dhe si zbritje nga tatimi mbi kapitalin e atij rezidenti një shumë të barabartë me tatimin e kapitalit të paguar në Kuvajt.

Megjithatë, kjo zbritje, në çdo rast, nuk do ta kalojë atë pjesë të tatimit mbi të ardhurat ose kapitalin, siç llogaritet para se të jepet zbritja që i atribuohet sipas rastit, të ardhurave ose kapitalit që mund të taten në Kuvajt.

3. Për qëllime të ndihmës financiare si kredi në një shtet kontraktues, tatimi i paguar në shtetin tjetër kontraktues do të përfshijë tatimin që është i pagueshëm në ndonjë mënyrë tjetër në atë shtet tjetër kontraktues, por është hequr dorë ose ulur në përputhje me ligjin ose masat e veçanta treguese të investimeve të hartuara për të nxitur zhvillimin ekonomik në atë shtet tjetër kontraktues.

Neni 25

Mosdiskriminimi

1. Shtetasit e një shteti kontraktues nuk do t'i nënshtrohen tatimit në shtetin tjetër kontraktues ose çdo kërkesë në lidhje me të që është më e rreptë sesa tatimi dhe kërkesat përkatëse të cilave shtetasit e atij shteti tjetër mund t'i nënshtrohen në të njëjtat rrethana.

2. Tatimi mbi një seli të përhershme që një ndërmarrje e një shteti kontraktues ka në shtetin tjetër kontraktues, nuk do të vendoset në mënyrë më pak të favorshme në atë shtet tjetër sesa tatimi i vendosur mbi ndërmarrjet e shteteve të treta që menaxhojnë të njëjtat aktivitete në të njëjtat rrethana. Kjo dispozitë nuk do të interpretohet si detyruese për një shtet kontraktues për t'u dhënë rezidentëve të shtetit tjetër kontraktues çdo ndihmë financiare personale, lehtësira dhe ulje për qëllime tatimore, duke marrë parasysh statusin civil ose përgjegjësitë familjare të cilat u jep rezidentëve të vet.

3. Ndërmarrjet e një shteti kontraktues, kapitali i të cilave zotërohet ose kontrollohet tërësisht ose pjesërisht, ose në mënyrë të drejtpërdrejtë apo jo nga një ose më shumë rezidentë të shtetit tjetër kontraktues, nuk do t'i nënshtrohet asnjë tatimi ose kërkesë që lidhet me të në shtetin e përmendur më parë, që është e ndryshme ose më e rreptë sesa tatimi dhe kërkesat e ngjashme, të cilave mund t'u nënshtrohen ndërmarrje të ngjashme, kapitali i të cilave zotërohet ose kontrollohet tërësisht ose pjesërisht, ose në mënyrë të drejtpërdrejtë apo jo nga një ose më shumë rezidentë të shteteve të treta.

4. Përveç rasteve kur zbatohen dispozitat e paragrafit 1 të nenit 9, të paragrafit 4 të nenit 11, të paragrafit 4 të nenit 12 ose të paragrafit 2 të nenit 13, interesi, pagesat për të drejtat e autorit dhe disbursime të tjera të paguara nga një ndërmarrje e një shteti kontraktues ndaj një rezidenti të shtetit tjetër kontraktues, për qëllim të përcaktimit të përfitimeve të tatueshme të kësaj ndërmarrjeje, do të zbriten sipas të njëjtave kushte sikur t'i ishin paguar një rezidenti të shtetit kontraktues të përmendur më parë. Po ashtu, çdo borxh i një ndërmarrjeje të një shteti kontraktues ndaj një rezidenti të shtetit tjetër kontraktues, për qëllim të përcaktimit të kapitalit të tatueshëm të kësaj ndërmarrjeje, do të zbritet sipas të njëjtave kushte sikur t'i ishin kontraktuar një rezidenti të shtetit të përmendur më parë.

5. Asnjë nga dispozitat e këtij neni nuk interpretohet sikur të vendoste një detyrim ligjor mbi një shtet kontraktues për t'u dhënë rezidentëve të shtetit tjetër kontraktues, përfitim nga ndonjë trajtim, preferencë ose privilegj që mund t'i akordohet ndonjë shteti të tretë ose rezidentëve të tij në bazë të formimit të një bashkimi doganor, bashkimi ekonomik, zone të tregtisë së lirë ose ndonjë marrëveshje rajonale ose nënrajonale që ka lidhje tërësisht ose kryesisht me tatimin ose qarkullimin e kapitalit në të cilin mund të jetë palë shteti kontraktues i përmendur më parë.

6. Në këtë nen, termi "tatim" nënkupton tatimet që i nënshtrohen kësaj.

Neni 26

Procedura e marrëveshjes së ndërsjellë

1. Kur një person konsideron se veprimet e një ose të dy shteteve kontraktuese rezultojnë ose do të rezultojnë për të në tatim në mospërputhje me dispozitat e kësaj, pavarësisht nga zgjidhjet e parashikuara nga legjislacioni i brendshëm i atyre shteteve kontraktuese, mund t'ia paraqesë çështjen e tij autoritetit kompetent të shtetit kontraktues në të cilin është rezident ose nëse çështja e tij trajtohet sipas paragrafit 1 të nenit 25, mund t'ia paraqesë autoriteteve kompetente të shtetit kontraktues në të cilin është shtetas. Çështja mund të paraqitet brenda tre vitesh nga njoftimi i parë i

veprimit që rezulton në tatimin në mospërputhje me dispozitat e kësaj.

2. Nëse kundërshtimi duket të jetë i justifikuar dhe nëse nuk është në gjendje të arrijë në zgjidhje të kënaqshme, autoriteti kompetent do të përpiqet të zgjidhë çështjen me anë të marrëveshjes së ndërsjellë, me autoritetin kompetent të shtetit tjetër kontraktues, me synim shmangien e tatimit që nuk është në përputhje me këtë konventë. Çdo marrëveshje e arritur do të zbatohet pavarësisht ndonjë afati kohor në legjislacionin e brendshëm të shteteve kontraktuese.

3. Autoritetet kompetente të shteteve kontraktuese do të përpiqen të zgjidhin me anë të marrëveshjes së ndërsjellë çdo vështirësi ose dyshim që lind në lidhje me interpretimin ose zbatimin e marrëveshjes. Ata gjithashtu mund të konsultohen së bashku për eliminimin e tatimit të dyfishtë në rastet të cilat nuk janë parashikuar në këtë konventë. Autoritetet kompetente të shteteve kontraktuese mund të komunikojnë me njëra-tjetrën në mënyrë të drejtpërdrejtë, me qëllim arritjen e një marrëveshjeje në kuptimin e paragrafëve të mësipërm.

Neni 27

Shkëmbimi i informacionit

1. Autoritetet kompetente të shteteve kontraktuese do të shkëmbejnë një informacion të tillë siç është i nevojshëm për zbatimin e dispozitave të kësaj ose të ligjeve të brendshme të shteteve kontraktuese në lidhje me tatimet e mbuluara nga kjo konventë për sa kohë që tatimi më poshtë të mos jetë në kundërshtim me këtë konventë. Çdo informacion i marrë nga një shtet kontraktues do të trajtohet sekret në të njëjtën mënyrë si informacioni i përfutur sipas ligjeve të brendshme të atij shteti kontraktues dhe do të zbulohet vetëm për personat ose autoritetet (duke përfshirë gjykata dhe organe administrative) të përfshira në vlerësimin ose mbledhjen, zbatimin ose procedimin në lidhje me përcaktimin e apeleve rreth tatimeve të mbuluara nga kjo konventë. Këta persona ose autoritete do të përdorin informacion vetëm për këto qëllime. Ata mund ta zbulojnë informacionin në procedime seancash gjyqësore me dyer të hapura ose në vendime gjyqësore.

2. Në asnjë rast, dispozitat e paragrafit 1 nuk do të interpretohen si të tilla që të vendosin mbi një shtet kontraktues detyrimin:

a) për të realizuar masa administrative në mospërputhje me ligjet dhe praktikatat administrative të atij shteti kontraktues ose të shtetit tjetër kontraktues;

b) të japin informacion që nuk është i përfutueshëm sipas ligjeve ose në punën normale të administratës së atij shteti kontraktues apo të shtetit tjetër kontraktues;

c) të japin informacion që do të zbulonte çdo sekret tregtar, biznesi, industrial, tregtar ose profesional ose proces tregtie apo informacion, zbulimi i të cilit do të ishte në kundërshtim me politikën publike (*rendin publik*).

Neni 28

Rregulla të ndryshme

1. Dispozitat e kësaj nuk do të interpretohen që të kufizojnë në ndonjë mënyrë ndonjë përjashtim, çlirim, zbritje, kreditim ose ndihmë tjetër financiare të dhëna aktualisht ose më pas ose:

a) nga ligjet e një shteti kontraktues në përcaktimin e tatimit të vendosur nga ai shtet kontraktues;

b) nga asnjë rregullim i veçantë mbi tatimin në lidhje me bashkëpunimin ekonomik ose teknik ndërmjet shteteve kontraktuese.

2. Autoritetet kompetente të secilit shtet kontraktues mund të caktojnë rregullore me qëllim realizimin e dispozitave të kësaj.

Neni 29

Anëtarët e misioneve diplomatike dhe postave konsullore

Asgjë në këtë konventë nuk do të cenojë privilegjet fiskale të anëtarëve të misionit diplomatik, një poste konsullore ose një organizate ndërkombëtare sipas rregullave të përgjithshme të legjislacionit ndërkombëtar ose sipas dispozitave të marrëveshjeve të veçanta.

Neni 30

Hyrja në fuqi

Shtetet kontraktuese do të njoftojnë njëra-tjetrën në lidhje me përfundimin e procedurave kushtetuese për hyrjen në fuqi të kësaj. Kjo konventë do të hyjë në fuqi ditën më të vonshme të këtyre njoftimeve dhe dispozitat e saj më pas do të kenë efekt në të dyja shtetet kontraktuese:

a) në lidhje me tatimet e mbajtura në burim për shumat e paguara ose të kredituara më ose pas 1 janarit të vitit në të cilin kjo konventë hyn në fuqi;

b) në lidhje me tatimet e tjera për periudha të tatueshme që fillojnë më ose pas 1 janarit të vitit në të cilin kjo konventë hyn në fuqi.

Neni 31

Kohëzgjatja dhe përfundimi

Kjo konventë do të mbetet në fuqi për një periudhë prej pesë vjetësh dhe do të vazhdojë të mbetet në fuqi më pas për një periudhë ose periudha të ngjashme, nëse një prej shteteve kontraktuese nuk njofton shtetin tjetër me shkrim, gjashtë muaj para skadimit të periudhës fillestare ose ndonjë periudhë të mëpasshme, në lidhje me synimin e tij për t'i dhënë fund kësaj. Në këtë rast, kjo konventë do të pushojë së pasuri efekt në të dyja shtetet kontraktuese:

a) në lidhje me tatimet e mbajtura në burim për shumat e paguara ose kredituara më ose pas 1 janarit të vitit në vazhdim në të cilin është dhënë njoftimi i përfundimit;

b) në lidhje me tatimet e tjera, për periudhat e tatueshme që fillojnë më ose pas 1 janarit të vitit në vazhdim pas atij në të cilin është dhënë njoftimi i përfundimit.

Në dëshmi sa më sipër të plotfuqishmit respektivë të të dyja shteteve kontraktuese kanë nënshkruar këtë konventë.

Bërë në qytetin e Kuvajtit më 19 Rabi II 1423 H, që i korrespondon datës 4 prill 2010, në dy kopje origjinale në gjuhën arabe, shqipe dhe angleze, të gjitha tekstet njëlloj të barasvlershme. Në rast mospërputhjes, teksti në gjuhën angleze do të ketë përparësi.